



**МОНГОЛ УЛСЫН
САНГИЙН САЙДЫН ТУШААЛ**

___ оны ___ сарын ___-ны өдөр

Дугаар___

Улаанбаатар хот

Аргачлал батлах тухай

Аж ахуйн нэгжийн орлогын албан татварын тухай хуулийн 30 дугаар зүйлийн 30.6, Хувь хүний орлогын албан татварын тухай хуулийн 17 дугаар зүйлийн 17.2 дахь заалтын тус тус үндэслэн ТУШААХ нь:

Нэг. “Газар эзэмших, ашиглах эрхийн үнэлгээ тооцох, татварын ногдлыг тодорхойлох аргачлал”-ыг нэгдүгээр хавсралтаар, “ашигт малтмал, цацраг идэвхт ашигт малтмал, газрын тосны хайгуул, ашиглалтын тусгай зөвшөөрлийн үнэлгээ тооцох, татварын ногдлыг тодорхойлох аргачлал”-ыг хоёрдугаар хавсралтаар, “Эрх борлуулсан, шилжүүлсний орлогод албан татвар ногдуулах журам”-ыг гуравдугаар хавсралтаар тус тус баталсугай.

Хоёр. Батлагдсан аргачлал, журмын хэрэгжилтийг хангаж ажиллахыг Татварын ерөнхий газар /Б.Заяабал/-т үүрэг болгосугай.

Гурав. Энэхүү тушаалын хэрэгжилтэд хяналт тавьж ажиллахыг Төсвийн бодлого, төлөвлөлтийн газар /Ж.Ганбат/, Төсвийн хяналт, эрсдэлийн удирдлагын газар /Н.Нарангэрэл/-т тус тус даалгасугай.

Дөрөв. Энэ тушаал батлагдсантай холбогдуулан Сангийн сайдын 2017 оны 379, 380 дугаар тушаалуудыг хүчингүй болсонд тооцсугай.

Ч.ХҮРЭЛБААТАР

ЭРХ БОРЛУУЛСАН, ШИЛЖҮҮЛСНИЙ ОРЛОГОД АЛБАН ТАТВАР НОГДУУЛАХ ЖУРАМ

Нэг. Нийтлэг үндэслэл

1.1.Хувь хүн, хуулийн этгээдийн газар эзэмших, ашиглах эрх, ашигт малтмал, цацраг идэвхт ашигт малтмал, газрын тосны хайгуул, ашиглалтын тусгай зөвшөөрөлийн эрх, эцсийн эзэмшигчийн эзэмшиж байгаа хувьцаа, хувь оролцоо, саналын эрхийг борлуулах, шилжүүлэх замаар Монгол Улсын хууль тогтоомжийн дагуу олгосон газар эзэмших, ашиглах эрх, ашигт малтмал, цацраг идэвхт ашигт малтмал, газрын тосны хайгуулын болон ашиглалтын тусгай зөвшөөрлийг бүрэн буюу хэсэгчлэн борлуулах, шилжүүлэхтэй холбогдон олсон орлогод албан татвар ногдуулахад энэхүү журмыг баримтална.

Хоёр. Эрх борлуулсан шилжүүлсний орлогод албан татвар ногдуулах

2.1.Газар эзэмших, ашиглах эрхийн үнэлгээ тооцох, татварын ногдлыг тодорхойлох аргачлал, ашигт малтмал, цацраг идэвхт ашигт малтмал, газрын тосны хайгуул, ашиглалтын тусгай зөвшөөрлийн үнэлгээ тооцох, татварын ногдлыг тодорхойлох аргачлалын дагуу тодорхойлсон тухайн эрхийн үнэлгээнд үндэслэн албан татвар ногдуулна.

2.2.Эцсийн эзэмшигчийн эзэмшиж байгаа хувьцаа, хувь оролцоо, саналын эрхийг борлуулах, шилжүүлэх замаар Монгол Улсын хууль тогтоомжийн дагуу олгосон газар эзэмших, ашиглах эрх, ашигт малтмал, цацраг идэвхт ашигт малтмал, газрын тосны хайгуулын болон ашиглалтын тусгай зөвшөөрлийг бүрэн буюу хэсэгчлэн борлуулсан, шилжүүлсний орлогод албан татвар ногдуулна.

2.3.Энэ журмын 2.1-д заасан үнэлгээний дагуу тодорхойлсон албан татвар ногдуулах орлогын сууриас эцсийн эзэмшигчийн борлуулсан, шилжүүлсэн хувьцаа, хувь оролцоо, саналын эрхээс эрх эзэмшигчийн хувьцаанд хамаарах хэмжээгээр тухайн эрхийн үнэлгээнээс хувь тэнцүүлэн тооцож, албан татвар ногдуулах орлогыг эцэслэн тодорхойлно.

2.4.Эцсийн эзэмшигч нь эрх эзэмшигчийн тухайд төлөөлүүлэн эзэмшиж байгаа хувьцаа, хувь оролцоо, саналын эрхийн нийт дүн, хэмжээг өөрчлөлгүйгээр эрх эзэмшигчээс эцсийн эзэмшигч хүртэлх үргэлжилсэн хэлхээ холбоонд хамаарах хуулийн этгээд хооронд хувьцаа шилжүүлэх, нэгдэх, нийлэх, тусгаарлах, шинэ хуулийн этгээд үүсгэн байгуулах хэлбэрээр хэлхээ холбоо доторх хувьцаа, хувь оролцоо, саналын эрхийн бүтцийг өөрчилсөн тохиолдолд эрх борлуулсан, шилжүүлсэн гэж үзэхгүй бөгөөд албан татвар ногдуулахгүй.

Гурав. Эрх борлуулсан, шилжүүлсний орлогод албан татвар ногдуулах орлогын дүнгээс чөлөөлөгдөх орлого

3.1.Гэр бүлийн тухай хуулийн 3.1.4-т заасан этгээд хоорондоо газар эзэмших, ашиглах эрхийн гэрчилгээгээ үнэ төлбөргүйгээр шилжүүлэх замаар олсон орлогыг албан татвараас чөлөөлнө;

3.2.Эцсийн эзэмшигч нь Монгол Улсад байрладаг албан татвар төлөгч бол тухайн эцсийн эзэмшигчийн хувьцаа, хувь оролцоо, саналын эрхээ борлуулсан, шилжүүлсний орлого болон энэ журмын 2.1-д заасан үнэлгээний зөвхөн аль өндөр дүнтэй орлогод холбогдох албан татварыг ногдуулна. Бага дүнтэй орлогыг албан татвараас чөлөөлнө.

3.3.Эрх эзэмшигчийн өөрийн, эцсийн эзэмшигчийн болон эрх эзэмшигчээс эцсийн эзэмшигч хүртэлх үргэлжилсэн хэлхээ холбоонд хамаарах хуулийн этгээдийн хувьцаа гадаад, дотоодын хөрөнгийн биржид нээлттэй арилжаалагддаг бол үргэлжилсэн 12 сарын хугацаанд эрх эзэмшигч, түүний эцсийн эзэмшигчийн нээлттэй арилжаалсан хувьцаа, хувь оролцоо, эсхүл саналын эрхийн 20 хүртэлх хувьтай тэнцэх хэмжээнд хамаарах эрх борлуулсан, шилжүүлсний орлогын дүнг албан татвараас чөлөөлнө.

Дөрөв. Эрх борлуулсан, шилжүүлсний орлогод албан татвар ногдуулах, төсөвт төлөх

4.1.Газар эзэмших, ашиглах эрх, ашигт малтмал, цацраг идэвхт ашигт малтмал, газрын тосны хайгуул, ашиглалтын тусгай зөвшөөрөл борлуулсан, шилжүүлэхэд энэ журмын хоёр дугаар хэсэгт зааснаар тодорхойлсон албан татвар ногдуулах орлогын дүнд 10 хувиар албан татвар ногдуулна.

4.2.Албан татвар ногдуулах орлогын сууриас эцсийн эзэмшигчийн борлуулсан, шилжүүлсэн хувьцаа, хувь оролцоо, саналын эрхээс эрх эзэмшигчийн хувьцаанд хамаарах хэмжээгээр тухайн эрхийн үнэлгээнээс хувь тэнцүүлэн тооцож, албан татвар ногдуулах орлогыг эцэслэн тодорхойлох бөгөөд эрх эзэмшигч нь 10 хувиар албан татвар ногдуулж, 30 хоногийн дотор төсөвт шилжүүлнэ.

4.3.Энэ журмын 4.3-т заасныг үл харгалзан, эрх эзэмшигчийн өөрийн, эцсийн эзэмшигчийн болон эрх эзэмшигчээс эцсийн эзэмшигч хүртэлх үргэлжилсэн хэлхээ холбоонд хамаарах хуулийн этгээдийн хувьцаа гадаад, дотоодын хөрөнгийн биржид нээлттэй арилжаалагддаг бол эрх эзэмшигч хагас жилд ногдуулсан албан татварыг 07 дугаар сарын 20-ны дотор багтаан, жилийн эцсийн татварыг дараагийн татварын жилийн 02 дугаар сарын 10-ны дотор төсөвт шилжүүлж, эцсийн тооцоог хийнэ.

4.4.Албан татвар төлөгч хуулийн этгээд нь энэ журмын дагуу ногдуулсан албан татварыг аж ахуйн нэгжийн орлогын албан татварын татварын тайланд хавсаргаж, Аж ахуйн нэгжийн орлогын албан татварын татварын тухай хуулийн 26.1, 26.2-т заасан хугацаанд харьяалах татварын албанд хүргүүлж, эцсийн тооцоог хийнэ.

4.5. Албан татвар төлөгч хувь хүн нь энэ журмын дагуу ногдуулсан албан татварыг Хувь хүний орлогын албан татварын татварын тухай хуулийн 26.1.1-т зааснаар дараа сарын 15-ны өдрийн дотор төсөвт төлж, албан татварын тайланг хуулийн 27.2-т зааснаар дараа оны 02 дугаар сарын 15-ны өдрийн дотор харьяа татварын албанд хүргүүлнэ.

4.6.Ашигт малтмалын тусгай зөвшөөрлийн эрх эзэмшигч нь энэхүү аргачлалын дагуу албан татвар ногдуулах орлогыг тодорхойлсон тооцооллыг Ашигт малтмал, цацраг идэвхт ашигт малтмал, газрын тосны хайгуул, ашиглалтын тусгай зөвшөөрлийн үнэлгээ тооцох, татварын ногдлыг тодорхойлох аргачлалын 5 дугаар хавсралтад заасан баримт материалын хамт Татварын

ерөнхий газрын харьяа Улсын төсвийн орлого, хяналтын газарт хүргүүлэх бөгөөд татварын алба хянаж баталгаажуулна.

---oOo---